

١٩٦٤/١٢/١٤

## خطاب الرئيس جمال عبد الناصر

من جامعة القاهرة في الاحتفال بعيد العلم العاشر

### ■ أيها الإخوة:

في كل مرة معكم هنا في عيد العلم، أجيء إليكم حاملاً مسئولية جديدة، أضعها على كاهل الطلائع المقتدرة، التي أتاح لها وطنها فرصة التفوق، فكانت على مستوى الفرصة، فشرفت وطنها بالامتياز العلمي، وكافأت في نفس الوقت تضحياته من أجلها. وحين أقف هنا في كل عام لأرى هذا الموكب الطويل من حملة المشاعل، فإني أشعر وكأنني أرى تيار الحياة الخلاق ذاته، يشق طريقه متقدماً متدفقاً - في ثبات واستمرار - إلى آفاق مفتوحة بغير حدود أو سدود.

إن موكب العلم هنا في كل عام مسيرة رائعة إلى الغد؛ ومن ثم فإن كل مانقوله في هذا المكان هو رسالة إلى المستقبل، الذي يحلم به ويخطط له ويناضل من أجله هذا الشعب العظيم.. ببناء الحضارة على طول العصور.

من هنا فإن الذين يمرون من هذا المكان كل عام، يحملون الأمانة العظمى للأحلام وللخطط وللنضال جميعاً.

وأريد أن أقول أمامكم في وضوح قاطع: يقينى بأن العلم هو الوعاء السليم، يستطيع أن يضم الأحلام والخطط والنضال، وأن يحفظها، وأن يصل بها إلى حيث تريد الإرادة الوطنية لها أن تصل. إن العلم في جميع المجالات هو بمثابة المصابيح الكاشفة، نوجهها إلى كل ما حولنا لنسجج بالنور تصورنا لشكل

المستقبل، ثم لنخطو بالنور وصولاً إليه، وبغير المصاييح الكاشفة للعلم في جميع المجالات فإن تصورنا للمستقبل، وحركتنا إليه، تصبح تحسناً أو تخبطاً فى المجهول وفى الظلام، ولقد آن الأوان الذى ينبغى فيه أن تستقيم وتسنقر نظرتنا العلمية إلى كل ما يواجهنا ونواجهه.. ولقد آن أن ندرك أن موقف رد الفعل - مهما كانت استجابته مخلصه للحوادث - لم يعد كافياً.

لقد وصلنا بمرحلة الانطلاق ووصلت بنا إلى؛ حيث يتعين علينا أن نتحمل مسئولية المبادأة، وأن نأخذ موقف الفعل الإيجابى، وأن نفرض على الظروف ومن فوقها إرادة العمل الوطنى وأهدافه، وذلك لا يمكن أن يتحقق إلا بقيام العلم بدوره كاملاً وشاملاً.. بل إننى أقول أكثر من ذلك.. أقول بأن موقف رد الفعل فى حد ذاته يتحتم أن يكون علمياً. إن الثورة ليست فوراً عاطفياً، وإنما الثورة فى أصلاتها هى علم تغيير المجتمع، ولا يتغير المجتمع بالغضب على ما كان فيه، وعدم الرضا بالأوضاع التى سادته، وإنما يتغير المجتمع بتحليل علاقات القوى الاقتصادية والاجتماعية فيه، وإعادة تشكيلها على أساس جديد لصالح أوسع الجماهير، ولو كانت الثورة مجرد فوران عاطفى، لاستطاع البطش أن يطفى ناراها، ولكن النار فى الثورة الحقيقية تبقى مشتعلة؛ لأن هناك أسباباً حقيقية وعلمية، تمنحها وقودها، الذى لا يفرغ طالما بقيت مسبباتها.

فى المرحلة السلبية؛ فى مرحلة الانقضااض لإزالة أسباب التخلف والتعويق فى مجتمع من المجتمعات، فإن الثورة هى الفهم العلمى للعلاقات الاجتماعية، والإصرار على تغييرها. وفى المرحلة الإيجابية؛ مرحلة التحرك لبناء المستقبل - تحرير حوافز الانطلاق والتقدم فى مجتمع من المجتمعات - فإن الثورة هى التخطيط، وليس التخطيط هو وضع كشف بالأمانى والأحلام، مثل هذا التخطيط ضياع مع الأوهام لا يصل إلى غير الفشل، وأما التخطيط الناجح - التخطيط العلمى - فهو بمثابة التصميم الأسمى لبناء، على اتساع رقعة وطن بأكمله.

البناء الاقتصادى والاجتماعى والثقافى يقوم على حساب دقيق لاحتياجات المستقبل.. وعلى حساب دقيق لتعبئة الموارد.. وعلى حساب دقيق لتحقيق

المراحل، مرحلة بعد مرحلة؛ كما يركز في أي بناء كل طابق على طابق تحته، وتقوم الطوابق كلها على أساس متين. وإذا كنا قد اخترنا الطريق الاشتراكي للبناء.. فإن الاشتراكية لا يمكن أن تكون إلا اشتراكية علمية، إن مجتمع الاشتراكية ليس جمعية خيرية تتبع معاييرها من نزعة الإحسان، لدى كل من المتبرعين بجهدهم أو بمالهم فيها.. وإنما الاشتراكية فكر وسلوك علمي، ينبع من الحق السياسي والاقتصادي والاجتماعي لكل إنسان حر، يعيش ويعمل فوق التربة الوطنية. وليس الإنتاج تجمعاً حول نداء صادر إلى كل الأيدي أن تجتمع وتضع يدها في العمل.. وإنما الإنتاج العلمي تجمع من حول رسم تفصيلي، يحدد لكل يد موقعها من العمل. إن التجمع من حول نداء قد يكون زحاماً يعطل أكثر مما ينجز، وأما الإنتاج العلمي فإنه يستمد قدرته على الإنجاز من أدوار مرسومة وفق خطة شاملة. وليست الخدمات هدايا من المباني، تبعثرها الدولة على رقعة الوطن، وإنما الخدمات خط موصلات هندسي علمي؛ يتعين عليه أن ينقل ويحمل مطالب التعليم والعلاج والثقافة، ومختلف أنواع التأمين، إلى كل فرد. بنفس المنطق، فإن التنظيم السياسي هو علم التعبئة السياسية للإمكانيات الإنسانية، وهو لا يختلف كثيراً في مفهومه العام عن علم التعبئة الاقتصادية للموارد والطاقات الطبيعية والبشرية.

وعلى المستوى القومي، فإن أمل الوحدة العربية ليس طيفاً وخيالاً يداعب أحلام النائمين، وإنما الوحدة العربية هي علم التاريخ على الأرض العربية ودروسه، وعلم الواقع المعاصر كله ومقتضياته، وعلم البناء الشامل للمستقبل ومتطلباته.. بل إنه على النطاق الدولي الأوسع، فإن العمل من أجل الحرية العالمية، وضد الاستعمار العالمي، لم يعد خطابات حماسية أو تظاهرات حاشدة؛ وإنما معركة من أجل الحرية، وضد الاستعمار في النطاق الدولي هي أولاً معركة علمية.. سياسية واقتصادية واجتماعية، أخطر ما فيها علينا أن الطرف الآخر المواجه لنا مازال يملك - حتى الآن - من أسباب العلم أكثر مما نملك.

أردت أن أقول لكم ذلك بوضوح، لكنى أريد أن أضيف إليه شيئاً اعتبره بمثابة النصف الآخر للحقيقة.. إذا كنت قد رسمت دور العلم فى جميع المجالات على النحو الذى قمت به، فإن العلم من جانبه ينبغى أن يستوفى شرطاً أساسياً لا يستطيع بغيره أن يحقق أمانته؛ تلك هى أن يكون العلم ملتزماً، ولست أنوى بذلك أن أدخل طرفاً فى النزاع التقليدى بين العلم للعلم والعلم للحياة، ففى اعتقادى أن كل علم مهما كان هو للحياة، لكنى أريد أن أطالب بما هو أكثر تركيزاً وتحديداً من ذلك.. أريد أن أطالب بأن يكون العلم ملتزماً إزاء المجتمع وإزاء أهدافه.. أعنى أنه من الضرورى أن يقوم العلم فى جميع المجالات بدوره، كضوء كاشف أمام حركة المجتمع وعلى طريق مستقبله، وليس معنى ذلك أن يقتصر العلم على المشاكل المباشرة والقريبة ولا يتعداها.

إننا لا نخطو إلى المستقبل بالأمانى بمجرد تبين مواقع أقدامنا، وإنما الرؤى البعيدة لها نفس ضرورة الرؤى القريبة، لكن المهم ألا يكون هناك انعزال لا يخسر به المجتمع علمه، وإنما يخسر به العلم نفسه ويضيع قيمته.

إن العلم بغير أن يلتزم بالمجتمع يتحول - كما قلت أمامكم هنا مرة من قبل - إلى نوع من ممارسة السحر؛ الذى كان يقوم به بعض الكيمائيين فى العصور الوسطى حين تستبد بهم المطامع، ويضيع منهم العمر فى محاولة عقيمة لتحويل الحديد إلى ذهب.

### أيها الإخوة:

إن الأديان كانت كلها رسالة علم إلهى تلقاها الأنبياء بالإلهام القدسى، ولم يحتكر واحد منهم ما تلقاه، ولا استفاد به لنفسه، وإنما أشاعوا العلم رسالة فى الناس، وجعلوا منه قوة تغيير اجتماعى صنعت المعجزات.

## أيها الإخوة:

لقد أردت أن أقول باختصار: إن العلم هو مركب الأمانى نحو المستقبل، والالتزام الاجتماعى دليله، الذى لا يخطئ على الطريق، وليبارك الله موكب العلم، الذى يجمعكم اليوم هنا، ولترتفع مشاعل النور على طريق الغد والأمل الكبير.

والسلام عليكم ورحمة الله.

١٩٦٤/١٢/٢٣

## خطاب الرئيس جمال عبد الناصر

فى احتفالات بورسعيد بعيد النصر

### ■ أيتها الإخوة المواطنين:

مرة أخرى ألتقى معكم هنا فى هذا المكان، بعد عام؛ لنحتفل بعيد النصر، كما نحتفل به منذ كانت حرب السويس المنتصرة وبورسعيد ظليعتها ومقدمتها الباسلة سنة ١٩٥٦، هذا النصر الذى تحقق سنة ١٩٥٦ سوف يبقى مع التاريخ؛ لأنه أكبر من مجرد انتصار وطنى، انتصار بورسعيد فى سنة ١٩٥٦ كان انتصاراً على مستوى الإنسانية كلها وللإنسان.. انتصار للإنسان فى تاريخه وفى حاضره وفى مصيره.

جماهيرنا.. جماهير هذا الشعب الطيب هى صانعة هذا النصر، وبضاعف من روعة هذا النصر أن جماهيرنا صنعته، ولكنها لم تصنعه لنفسها فقط، ولكنها صنعته للإنسانية وللإنسان.. هذا النصر صنعه إيمان هذه الجماهير بهدفها، رؤيتها الواضحة لهذا الهدف، تصميمها الأكيد على تحقيق هذا الهدف، صبرها على التضحية والشجاعة تحت النار احتمالاً للمسئولية الضخمة، وبعون الله وبإذن الله نحتفل دائماً فى كل عام بهذا العيد، ونكون قد حققنا فى كل عام النصر بتحقيق أهدافنا التى نعمل من أجلها كل عام، كما نحتفل اليوم بهذا العيد، وقد حققنا الأهداف التى صممنا عليها فى العام الماضى.

## أيها الإخوة:

اسمحوا لى باسمكم أن أحيى وأشكر الدكتور محمد التيجانى، عضو مجلس السيادة للسودان الشقيق، وأحيى شعب السودان الشقيق.. الدكتور التيجانى فى سنة ٥٦ كان هنا فى مصر، وأنا أعرف واقعة.. أعرف إن أمّا حصل العدوان على بورسعيد تطوع علشان يبجى يحارب هنا، وكدكتور يعمل فى بورسعيد، وطبعًا هذا الشعور وهذه العاطفة ليست غريبة؛ فشعب وادى النيل فى شماله فى مصر وفى جنوبه فى السودان شعب من الإخوة.. من الأشقاء، نحن نحى شعب السودان الشقيق.. نحن نحى ثورة السودان الشقيق، ونحن نقول لإخوتنا فى السودان، اللى تعرضوا للتهديدات من "تشمى" فى الأسبوع الماضى إن احنا معاهم قلباً وقالبا زى ما كنا زمان معاهم إخوة، وباستمرار على مر السنين حنكون إخوة.. لن نستطيع الاستعمار أن يفرق بيننا.. ولن نستطيع الاستعمار أن يوقع بيننا.. ولن نستطيع الاستعمار إنه يخلى مصر تعزل من هنا، أو السودان يعزل من جنوب مصر؛ حنفضل مع بعض كده إلى أبد الأبدى الإخوة الأشقاء الأحباء.. نحن مع شعب السودان الشقيق ومع حكومة السودان الوطنية، ونحن نساندهم بقلوبنا؛ لأننا يجرى فى عروقنا دم الإخوة ودم الأشقاء.

اسمحوا لى أيضًا أن أرحب بالوفد السوفيتى؛ وفد مجلس السوفيت الأعلى ورئيسه السيد "فيليدى" وأحييهم باسمكم، باسم شعب الجمهورية العربية المتحدة، وأقول لهم إن احنا لن ننسى أبداً تأييدكم لنا فى جميع الأيام العصبية اللى مرت بنا، لن ننسى تأييدكم لنا فى سنة ٥٦ حينما تعرضنا للعدوان الثلاثى ولن ننسى أبداً مساندتكم لنا فى بناء السد العالى، الذى كان حلم كل واحد فينا وأمل كل واحد فينا؛ لأن السد العالى بالنسبة لنا كان مسألة حياة أو موت.. السد العالى كان أملاً وطنياً.. وكان رغبة وطنية.. وكان مطلب شعبى، ونحن لن ننسى أبداً السد العالى وسيبقى هذا السد على مر الأيام وعلى مر العصور رمزاً للصدقة العربية - السوفيتية.. الصدقة المنزهة عن الغرض.. والصدقة المنزهة عن الهوى.. الصدقة من أجل المثل العليا.. والصدقة من أجل المبادئ. وقد رأينا

كيف استطاع العمال السوفييت في أسوان في درجة الحرارة العالية إنهم يتحملوا الحر الشديد؛ من أجل أن يقوموا بهذا العمل الكبير والعمل الضخم الذى تعهد الاتحاد السوفيتى بأن يتعاون معنا فى إنشائه.. لن ننسى أبداً هذه الصداقة، وباسمكم وباسم شعب الجمهورية العربية المتحدة أحيى الاتحاد السوفيتى، وأحيى حكومة الاتحاد السوفيتى.. وأحيى وفد مجلس السوفييت الأعلى الموجود معنا اليوم فى هذا المكان، ويسعدنا أن يشاركونا فى أعياد النصر، وفى احتفالنا بأعياد النصر.

### أيها الإخوة:

ونحن نحفل بأعياد النصر، ندرك حقيقة النصر وندرك جوهر النصر.. ندرك أن أعياد النصر لا قيمة لها مطلقاً إلا إذا كانت حوافز لعمل جديد.. لا نستطيع أن نعيش على النصر، ولا نستطيع أن نعيش على ذكريات النصر؛ إن الشعوب تتخلى عن ثورتها إذا تحولت أعيادها إلى ذكريات تحفل بأيامها على مر السنين، إن الأعياد لدى الشعوب الحرة والحية دوافع إلى التقدم تتجدد، ونحن نعمل كل عام ونحن نحفل بعيد النصر، ونأخذ من عيد النصر ومن ذكريات النصر دوافع حتى نتقدم إلى أهدافنا.. ونأخذ من هذه الأعياد حوافز حتى نعمل العمل الجديد. ليس معنى العيد.. مش معنى العيد أبداً إن احنا نعمل مهرجانات ونضرب ونفرق صواريخ والناس يتقف فى الشوارع وتهتف، ولكن فى العيد لازم نحس بمعناه، بالأمل الجديد اللى بيتنازع نفوسنا ويتنازع أرواحنا.. العزم الصادق، مقدار ما يفجره هذا العيد من إرادة العمل. لا نكتفى أبداً إن احنا نقف هنا كل سنة ونحفل بذكريات سنة ٥٦، ونعتبرها أروع سنوات نضالنا.. سنة ٥٦ كانت من أروع سنوات نضالنا ضد العدوان ولكننا نناضل كل يوم، كل يوم بنناضل من أجل أن نبني بلدنا.. ومن أجل أن نرفع مستوى المعيشة فى بلدنا.. ومن أجل أن نقضى على التخلف.. ومن أجل أن نقضى على الاستغلال.. ومن أجل أن نقضى على كل الآثار اللى تركها الاستعمار فى بلادنا، كل سنة بنكافح،

وكل سنة بنقاتل، وكل سنة بنحارب، وكل سنة بنسير في معركة قوية ونحافظ على استقلالنا، ونثبت استقلالنا، وندعم استقلالنا.

في يوم العيد كل سنة لازم نذكر كل هذه المعاني، ولا نشعر إن أكبر سنواتنا كانت سنوات ٥٦.. كل سنة عندنا نضال وكل سنة عندنا قتال.. وكل سنة عندنا كفاح وكل سنة عندنا عمل، فيه ناس بتعمل في الأرض، وفيه ناس بتعمل في المصانع، وفيه ناس بتعمل مصانع جديدة، وفيه ناس بتصلح أرض جديدة، وفيه ناس بتعمل وتخلق وتبنى؛ من أجل أن نعيش نحن الحياة السعيدة، ومن أجل أن يوجد المجتمع اللي فيه العدالة والمساواة من أجل أبنائنا.. كل سنة نقف هنا في ذكرى النصر الكبير ونتحدث عن الانتصارات اللي أضفناها في السنة اللي فاتت، نتحدث عن أعمال حقيقية عززت مكانة هذا النصر، وحمّت المكاسب اللي حققناها في سنة ١٩٥٦.. خير شيء نستطيع أن نستلهمه من معنى عيد النصر هو أن نستعرض ما استطعنا أن نفعله وما استطعنا أن نعمله.

السنة اللي فاتت.. من سنة كنت واقف في هذا المكان في لقائنا السنوي يوم العيد، وطبعاً النهارده بعد سنة يجب إن احنا نسأل أنفسنا إيه اللي فعلناه في السنة اللي فاتت؟ لا بد إن احنا ننتهز الفرصة ومش بس نتكلم على سنة ٥٦ واللى عملناه ٥٦ وضربنا الإنجليز وضربنا الفرنسيين وصَدِّنا عدوان إسرائيل وقضينا على العدوان الثلاثي، لأ.. من ٥٦ واحنا النهارده ٦٤ وداخلين على ٦٥ بنشوف إيه اللي عملناه في السنة اللي فاتت؛ وبهذا بنقدر نقدر موقفنا، وبهذا نستطيع أن نطمئن ويرتاح بالنا ويرتاح ضميرنا، حينما نتأكد إن احنا فعلاً في السنة اللي فاتت استطعنا أن نقوم بالعمل الذي يمكننا من أن نحقق أهدافنا، أهدافنا أهداف كبيرة.. أهدافنا أهداف عظيمة، عملنا يجب أن يكون عملاً متواصلاً.. عملنا يجب أن يكون عملاً مضاعفاً.

في السياسة العالمية؛ موقفنا بالنسبة للسياسة العالمية.. كنا دولة مستعمرة استطعنا إن احنا نطلع الإنجليز، ثم حققنا الاستقلال، ثم دعمنا هذا الاستقلال، ثم ثبتنا هذا الاستقلال، ثم قررنا إن احنا نتبع سياسة مستقلة؛ سياسة عدم الانحياز،

هل استطعنا أن نحافظ على هذا؟ هل استطعنا أن نحافظ على ثورتنا؟ هل استطعنا أن نحافظ على قدرتنا على الإندفاع؟ هل لازال جهدنا قادر على التحليق في الأفاق الكبيرة التي كنا باستمرار بنحلم بها والتي كنا باستمرار بنتماها؟ السنة التي فاتت كانت سنة هامة في تاريخ تطورنا، مرينا من مرحلة ودخلنا مرحلة أكثر تقدم، مسؤولياتنا في المرحلة الجاية، أكبر من مسؤولياتنا في المرحلة التي فاتت.. مسؤوليتنا في المرحلة الجاية أكبر من مسؤوليتنا في المرحلة التي فاتت.. العمل في المرحلة الجاية أكبر من العمل الذي احنا قمنا به في المرحلة التي فاتت، العمل الذي ينتظرنا عمل أكبر وعمل أضخم، وزى ما قلت في مجلس الأمة في أول دورته: إننا اجتزنا مرحلة التحول العظيم وبدأنا مرحلة الانطلاق العظيم، ولكن مرحلة الانطلاق لا تتحدد ولا تتم بمجرد وصفنا له، ولكن بالعمل وحده نستطيع إن احنا نحقق مرحلة الانطلاق.. بالنضال اليومي على كل الجبهات بنستطيع أن نحقق مرحلة الانطلاق.

كنا في سنة ٥٦ كان فيه إنجليز هنا وخرجوا الإنجليز، جيت لكم أنا هنا في بورسعيد سنة ٥٦ - في شهر يونيو - ورفعنا العلم لأول مرة، أول مرة تحررت بورسعيد من العلم البريطاني ورفعنا العلم المصري في سنة ٥٦، وبعدين رجعوا الإنجليز تاني في أكتوبر وبعدين طلغوا، وناس قدمت أرواحها، وناس قدمت دماها، ثم صممنا على إن احنا نحمل بلدنا وزادت تقننا.. كنا عايزين نطلع الإنجليز مرة واحدة طلغناهم مرتين، كنا عايزين نطلع الإنجليز بس، طلغنا الإنجليز ومعاهم الفرنسيين، كنا عايزين نتخلص من استعمار طويل، تخلصنا من هذا الاستعمار الطويل، ثم واجهنا غزوا وعدوانا واستطعنا أن نتخلص منه وأن تبقى هذه البلاد حرة لأبنائها.

كنا لنا آمال كبيرة حققناها ثم حققنا آمال أكبر منها، ما حققناهاش أبداً بالتمن الرخيص حققناها بالتمن الغالي، وأنا عارف ان التمن الذي حققناها به كان تمن غالي، عارف إن فيه ناس ماتت أولادها وفيه ناس ماتوا عائلتها، وفيه ناس استشهدوا، دول ناس بنوا لنا هذا الوطن الذي احنا بنعيش فيه، وضحوا بأغلى ما

يملكه الإنسان اللي هو الروح، أو أعلى ما يملكه الإنسان اللي هو الابن، ولكن هذه ضريبة فرضت علينا، وهذا حق علينا كان لابد إن احنا نقوم به، وكل واحد قام بدوره وكل واحد أدى واجبه، وكل واحد رفع السلاح. وكان كل واحد فى بلدنا مستعد إنه يؤدي دوره، ومستعد إنه يؤدي واجبه، ومستعد إنه يحمل السلاح، ومستعد إنه يموت فى سبيل أن تتحقق هذه الآمال الكبار اللي كنا دائماً بنحلم بها، واللى كان بعض الناس بيقلولوا لنا عليها إنها آمال مستحيلة، وإن مين حيقدر يطلع الإنجليز من مصر، وإن الإنجليز مش ممكن يطلعوا من مصر! طلعوا الإنجليز من مصر.. طلعوا الإنجليز من مصر وبنبنى مصر الحرة، بنبنى مصر المستقلة.. بنبنى مصر اللي لها سياسة تتبع من نفسها وتتبع من ضميرها، بنبنى لنفسنا مركز فى العالم، بنبنى لنفسنا مركز فى المجال الدولى فى العالم الدولى، زى ما قلت فى مجلس الأمة احنا لنا كلمة ولنا قيمة إن سياستنا... وإن احنا مش زى إيران، إيران بلد خاضعة للاستعمار، طبعاً مسلطينها علينا الأيام دى بيشتمنا شاه إيران كل يوم والثانى، بيعمل مؤتمر صحفى بيشتمنا، طبعاً مش هو اللي بيشتم ولكن بيدوروه، وأسياده بيدوروه وبعدين هو بيشتم بعد كده.

طبعاً احنا مش زى إيران؛ إيران مستعمرة أمريكية، مستعمرة صهيونية.. إيران خاضعة للنفوذ الأمريكى.. إيران خاضعة للنفوذ الصهيونى، ومين السبب فى هذا؟ طبعاً شاه إيران الذى يستغل طبعاً إيران من أجل نفسه وينهب أموالها ويسرق أموالها، وبهذا أصبحت إيران ايه فى العالم؟ أصبحت إيران دولة داخلية ضمن أحد الأحلاف الغربية وواقعة تحت حماية الغرب. بيدوا له معونات كل سنة بيسرق شوية ويصرف شوية ويدى الجيش شوية وبعد كده بيبجوا يملؤه علشان يشتمنا بيشتمنا، يملوه اليهود يشتمنا، يملوه الأمريكان يشتمنا، وبيعقدوا إن كلام شاه إيران دا ممكن يكون له تأثير لأنه بلد إسلامى، إذا كانت إيران بلد إسلامى.. لكن شاه إيران لا يمكن إن احنا نعتبره مسلم؛ لأن مطية الصهيونيين لا يمكن أن يكون مسلم لأنه بيكون خارج عن دين الإسلام وخارج عن المسلمين.. مطية المستعمرين لا يمكن أن يكون مسلم، وأنتم تعرفوا احنا ليه

قطعنا علاقتنا بإيران من عدة سنوات؛ لأن إيران أصبحت مرتع لإسرائيل وأصبحت مرتع للصهيونية، احنا بلد مستقل لا يستطيع أى إنسان، ولا تستطيع أى دولة انها تخلينا نحيد عن استقلالنا، أو نحيد عن أن نرسم السياسة اللى احنا مقتنعين بها.

فى المجال الدولى أصبحت مصر لها مكانة كبرى فى العالم، عقد هنا المؤتمر الإفريقى زى ما قلت فى مجلس الأمة برضه، إسرائيل كانت بتقول إن المؤتمرات دى بتتكلف إيه وتعمل إيه؟ طبعاً أمأً بيعقد هنا مؤتمر إفريقى وبيجوا كل قادة إفريقيا هنا فى مصر وبيشوفوا هذا الشعب المصرى وبيشوفوا الصناعات المصرية بيقولوا إيه؟ بيقولوا هذا شعب استطاع إنه يبنى بلده واستطاع إنه يستقل.. استطاع إنه يقضى على الاستعمار.. استطاع إنه يهزم الدول الكبرى.. استطاع إنه يقيم صناعة.. استطاع إنه يطور زراعته.. استطاع إنه يطور نفسه، بيقولوا هذا الشعب استطاع انه يعمل كده، إذا احنا فى إفريقيا كل بلد فى إفريقيا تستطيع انها تعمل هذا العمل، كل بلد فى إفريقيا تستطيع انها تكون مستقلة، كل بلد فى إفريقيا تستطيع انها تصنع نفسها.. كل بلد فى إفريقيا تستطيع انها تخلق الفنيين.

إذا الاستعمار لا يرضى أبداً وما يعجبوش أبداً إن القادة الإفريقيين بيجوا هنا، ويشوفوا فى الدعايات الأجنبية بتقول لهم هناك إن الشعب المصرى شعب متأخر، وإن مصر ما فيهاش أى حاجة أبداً... إلى آخر هذا الكلام، بيجوا هنا يشوفوا فعلاً إيه الحقيقة، وبيجدوا فيكم المثل الطيب والمثل السليم، اللى يجب إنهم يحذوا حذوه ويعملوا زيه علشان يثبتوا استقلالهم فى بلدهم، وعلشان يبنوا بلدهم ويقدرروا أما يشوفوا الوضع هنا فى بلدنا إيه يطلعوا بنتائج إن السبيل الوحيد إلى الاستقلال هو سبيل اتباع السياسة السليمة، السياسة التى تنبع من الضمير، وما فيش حاجة أبداً بين الاستعمار والاستقلال؛ يا إما البلد مستعمر يا إما البلد مستقل، أما البلد اللى شبه مستقل فهو بالفعل بلد مستعمر.

فيه مؤتمر أيضاً الدول غير المنحازة اللي انعقد هنا فى مصر، مؤتمر الدول غير المنحازة اللي انعقد هنا فى مصر يدل على قيمة مصر؛ لأن إذا جات الدول الغير المنحازة؛ ٥٧ دولة، واختارت مصر علشان تكون فيها.. علشان يكون فيها المؤتمر، واختارت القاهرة بالذات لتكون مكان انعقاد المؤتمر، دا شرف كبير لنا احنا نعتز به، وإن دول العالم كلها؛ دول العالم اللي غير منحاز تكرم مصر وتكرم القاهرة بأن تكون القاهرة مكاناً لمؤتمر عدم الانحياز. طبعاً بعد كده الاستعمار لا يعجبه هذا، والصهيونية ما يعجبهاش هذا الكلام، ومن الاستعمار والصهيونية نجد الحملات على المؤتمرات اللي احنا عملناها هنا، ولكن احنا نفخر بأن بلدنا أصبحت هى البلد الذى تلتقى فيه حركات التحرير.. البلد الذى تلتقى فيه الدول الإفريقية المستقلة.. البلد الذى تلتقى فيه الدول الغير المنحازة.

دا فى مجالنا الدولى، طب كنا فين قبل سنة ٥٢؟ مين فكر ييجى يعمل مؤتمر؟ كان عندنا امتيازات أجنبية، كان عندنا جيش إنجليزى، وماكانش عندنا أبداً حتى علاقات فى المجال الدولى إلا مع إنجلترا وفرنسا وبعض دول غربية، وماكانش لنا أبداً سياسة خارجية مستقلة؛ لأن احنا فعلاً كنا تابعين لإنجلترا، كان فيه هنا السفير البريطانى وقبله كان موجود هنا المندوب السامى البريطانى، وكنا تابعين لإنجلترا، وماكانش لنا أبداً الحق فى أن نتبع سياسة خارجية مستقلة. وطبعاً النتيجة إن ماكانش لنا أبداً أى سمعة فى العالم أو أى سمعة دولية إلا طبعاً سمعة الملك فاروق اللي بيروح كابرى وبيروح روما وبيروح قبرص وبيروح رودس، وأنتم عارفين السمعة دى كانت، على أى شكل، وعلى أى أساس.

النهارده الوضع اختلف، معروف إن احنا لنا وضع مستقل، اللي بيدينا كلمة بندى له عشرة، رأينا اللي احنا عايزينه بنقوله.. ورأينا اللي احنا عايزينه بنقله وما بنخافش، علاقتنا بحركة التحرر الوطنى فى العالم.. فى سنة ٥٦ حصل إيه أما احنا جابها العدوان؟ كنا منتظرين إن العالم يؤيدنا، كنا منتظرين، من كل أنحاء العالم إن القوة المعنوية العالمية تؤيدنا حتى ترهب الاستعمار، وكنا بنقدر

أى كلمة فى سنة ٥٦ تؤيدنا، كنا بنقدر أى تأييد لنا فى سنة ١٩٥٦، وفعلاً استطاعت القوى المعنوية العالمية أن ترهب الاستعمار، واستطاعت القوى المعنوية العالمية والقوى المحبة للسلام فى العالم إنها ترهب الاستعمار، وساعدت على إنهاء العدوان، وساعدت على دحر العدوان، هل بعد هذا نتنكر للقوى الوطنية الصاعدة فى العالم أو نعاملهم بالمثل زى ما اتعاملنا احنا فى سنة ٥٦، وزى ما كنا فى سنة ٥٦ منتظرين من العالم ومن دول العالم إنها تؤيدنا؟!!

النهارده جميع الدول التى تحارب من أجل الاستقلال.. جميع الحركات الوطنية، حركة التحرير الوطنى فى كل أنحاء العالم تنتظر من العالم ومن القوى المعنوية فى العالم، ومنا احنا بالذات إن احنا نساعدنا ونعاونها، وطبعاً علاقتنا بهذه القوى علاقة واضحة.. نحن نؤيد جميع قوى التحرير الوطنى فى العالم.

طبعاً إخوانا الجزائريين أما كانوا بيحاربوا أيضاً، كانت هناك قوى فى العالم تؤيدهم، وبهذا استطاعت الجزائر أيضاً إنها تحصل على استقلالها. نحن نؤمن بحتمية انتصار الحرية، ونؤمن بوحدة انتصار الحرية، ونؤمن أن الحرية غير قابلة للتجزئة؛ بمعنى إن أنا لا أستطيع أن أؤيد الحرية فى مكان ولا أؤيدها فى مكان آخر، واجبى أن أؤيد الحرية فى كل مكان، وواجبى - كشعب قاسى من الاستعمار، وقاسى من العدوان - أن نستنكر العدوان فى كل مكان.

أما حصل عدوان على الكونجو، ونزلت قوات أمريكية وقوات بلجيكية فى ستانليفيل استنكرت هذا العدوان، إيه الفرق؟ إيه الفرق بين العدوان الإنجليزى - الفرنساوى على بورسعيد سنة ٥٦ والعدوان الأمريكى - البلجيكى على ستانليفيل سنة ٦٤؟! دول ناس معاهم سلاح ودول ناس معاهم سلاح، دول نزلوا بالباراشوت ودول نزلوا بالباراشوت، دول قتلوا أهالى البلد ودول قتلوا أهالى البلد. نحن ضد العدوان بأى شكل من الأشكال، نحن من أجل حرية الشعوب، طيب هل "تسومبى" نستطيع أن نعترف به إنه هو يمثل شعب الكونجو؟ "تسومبى" قاتل، وإذا كانت أمريكا وإذا كانت بلجيكا بيجيبيوا "تسومبى" يعملوه رئيس وزارة؛ بيبقى رئيس وزارة لحساب أمريكا ولحساب بلجيكا، ولا يمكن لنا

بأى حال من الأحوال إن احنا نعترف به كرئيس وزارة يمثل شعب الكونجو، مش بس احنا اللي ما اعترفناش به.. أنتم عارفين أما جا هنا "تسومبى" فى وقت مؤتمر عدم الانحياز لم تعترف به دول مؤتمر عدم الانحياز، ولا دولة واحدة وافقت إنه يحضر المؤتمر يمثل شعب الكونجو.

إذا اللي بيقولوا إن "تسومبى" يمثل شعب الكونجو مين؟ الأمريكان والبلجيك.. احنا بنقول إن "تسومبى" ليس إلا عميلاً من عملاء الاستعمار، "تسومبى" ليس إلا عميلاً من أجل مصالح أمريكا، ومن أجل مصالح بلجيكا فى الكونجو، واحنا لا يمكن بأى حال من الأحوال أن نقبل أن ينجح هذا الممثل فى إفريقيا، ولكن يجب أن يفشل هذا الممثل فى إفريقيا، ويجب أن تتجح القوى الوطنية فى إفريقيا.. احنا ساعدنا شعب الكونجو قالوا إن احنا ساعدنا شعب الكونجو، وأنا باقول آه.. ساعدنا شعب الكونجو وبعتنا لشعب الكونجو سلاح، وحنبعنا لشعب الكونجو سلاح، الموضوع ما فيش داع بأى حال من الأحوال إن احنا ننكره، أو إن احنا نخبيه؛ لأن احنا لا نعترف بـ "تسومبى".. لا نعترف بـ "تسومبى" عميلاً للاستعمار.. نعتبر إن الثوار الوطنيين فى الكونجو يحتاجوا إلى كل تأييد من القوى الوطنية ومن القوى الشريفة فى العالم، وأنتم الشعب اللي قابل عدوان سنة ٥٦ لا يمكن أن يقبل بأى حال من الأحوال أن يتعرض شعب الكونجو لعدوان مماثل بهذا العدوان اللي حصل سنة ٥٦ ولا أساعدوش.

إذا دى سياستنا.. سياستنا واضحة معروفة، بنقولها بوضوح، وبنقولها على المكشوف وما بنخيشش، ما نسيناش أبداً إن احنا بعنا سلاح للكونجو، وبنقول إن احنا بعنا سلاح للكونجو وحنبعنا سلاح للكونجو.

دى سياستنا.. سياسة مستقلة، واحنا بنقول إن احنا أما بنتعامل مع دول العالم، بنتعامل معاها على أساس ان ماحدش يتدخل فى شئوننا، ولكن إذا كانوا الأمريكان بي فهموا إنهم بيدونا شوية معونة علشان يججوا يتحكموا فينا ويتحكموا فى سياستنا، أنا باقول لهم احنا متأسفين، احنا مستعدين ننزل الشاى شوية، بنقل من استهلاكنا فى الشاى.. بنقل من استهلاكنا فى البن.. وبنقل من استهلاكنا فى

بعض حاجات ونحافظ على استقلالنا، وإلا نضيع استقلالنا خالص يبقى معركة سنة ٥٦ ما فيهاش أى فائدة. ليه أنا باقول احنا بناخد من الأمريكان قمع، لازم نعرف المواضيع بالفتوح، قمع، ولحمة، وفراخ، ما بناخدش مصانع، والله أبدأ يعنى ما بيدوناش مصانع، بيدونا بحوالى ٥٠ مليون جنيهه فسى السنة، احنا ميزانيتنا فى السنة ١١٠٠ مليون جنيهه، بنصرف على الخطة حوالى ٤٠٠ مليون جنيهه أو ٥٠٠ مليون جنيهه؛ إذا دعى الأمر إن احنا نوفر الـ ٥٠ مليون جنيهه بنوفرها على الجزمة، ولا بتهمنا والله العظيم.

ليه أنا باقول هذا الكلام؟ أنا باقول هذا الكلام النهارده بمناسبة امبارح السفير الأمريكى قابل نائب رئيس الوزارة للتموين، وراح عنده مقمص وزعلان وقعد عنده دقيقتين، وكان مفروض حَيِّكَلْمُه على التموين - المواد التموينية اللي احنا بنجيبها من أمريكا حسب قانون الحاصلات - وقال له والله إن أنا ماباقدرش أتكلم أبدأ دلوقت فى هذا الموضوع.. ليه؟ لأن سلوكتنا يعنى - احنا - هنا فى مصر مش عاجبهم. أنا باقول له هنا اللي سلوكتنا مش عاجبه يشرب.. يشرب منين؟ (وترد الجماهير من البحر) يشرب من البحر وإن ماكفهوش... وقلت هنا اللي ما يكفهوش البحر الأبيض بندى له البحر الأحمر يشربه كمان!

اللى أنا بدى أقوله إن احنا لا يمكن نبيع استقلالنا علشان ٣٠ مليون جنيهه واللا ٤٠ مليون واللا ٥٠ مليون جنيهه، إن احنا مش مستعدين نقبل من واحد أى كلمة.. اللي بيكلمنا أى كلمة بنقطع له لسانه؛ كده كلام واضح وكلام صريح، إذا كنا النهارده بنشرب شاي ٧ أيام نشرب ٥ أيام لغاية ما نبني بلدنا، إذا كنا بنشرب قهوة ٧ أيام نشرب ٤ أيام، إذا كنا بناكل لحمة ٤ أيام ناكل لحمة ٣ أيام.

اللى أنا بدى أقوله إن طبعاً مناسبة هذا الكلام فى الوقت اللي بيقولوا إن احنا عندنا أزمة تموين وعندنا كذا وعندنا كذا إن دل على شىء فيدل على إنه طريقة من طرق الضغط، احنا متأسفين ما بنقبّل الضغط، وما بنقبّل الكلام السخيف، وما نقبلش الرذالة أبدأ، واحنا ناس خلقنا ضيق، خلقنا كده وطبيعتنا كده. (هتاف من الجماهير ناصر.. ناصر.. ناصر...).

وبعدين احنا ناس عندنا كرامة، شعب عنده كرامة ومش مستعد يبيع الكرامة دي ولا بألف مليون جنيه، مش بـ ٥٠ مليون جنيه ولا بـ ٣٠ مليون ولا بـ ٤٠ مليون جنيه. طبعاً بيقول إن إيه؟ إن فيه أزمة هنا، واحنا عندنا أزمة كذا وأزمة كذا، طبعاً الأزمة دي يعنى موضوعها سهل وإن كانت علامة شىء فهى علامة صح.

احنا ميزانيتنا ١١٠٠ مليون جنيه.. سنة ٥٢ كانت ميزانيتنا أقل من ٢٠٠ مليون جنيه، احنا بنصرف على الخطة أكثر من ٤٥٠ مليون جنيه، ما يقرب من ٥٠٠ مليون جنيه، تعرفوا لو نوفر ٣ مصانع أو ٤ مصانع مثلاً كل سنة بنغرق الدنيا لحمه، وبنغرق الدنيا سمك، وبنغرق الدنيا فراخ، وبنغرق الدنيا شاي.

طبعاً احنا عاوزين مصانع وعايزين أرض جديدة نصلحها علشان نزود الزراعة ونزود الصناعة، بيقولوا ما بنستوردهش، طب ما احنا نقدر نقفل ٣ مصانع ونستورد من "ماكس فاكاتور".. ونستورد من إنجلترا.. ونستورد من فرنسا ونجيب لكم كولونيات، ونجيب لكم روايح ونجيب لكم...

هل الشعب فعلاً عايز كده؟ سنة ٥٢ استثمرنا فى الصناعة ٢ مليون جنيه، اللي اتصرف على المصانع سنة (٥٢) ٢ مليون جنيه، السنة دي اتصرف على المصانع أكثر من ١٥٠ مليون جنيه، السنة اللي فاتت كان ١١٥ مليون جنيه، السنة الجاية حيوصل إلى ٢٠٠ مليون جنيه، دا على الصناعة بس، فإذا كنا بنوفر فى أموالنا وبنزود فى خطتنا بان احنا عايزين نبني بلدنا ونخلق فعلاً فى بلدنا المجتمع اللي ترفرف عليه الرفاهية، نخلى البلد لأبنائها كلها، لناسها كلها، ما نخليش البلد لفئة قليلة من الناس، طب أنا النهارده لو ما أبنيش مصانع وأجيب كل الكماليات، حتى السلامة أجيب لكم سلامة من فرنسا بيحصل إيه؟! لأ.. مش سلامة على الطريقة الصعيدي سلامة على الطريقة الفرنسي، طب حيحصل إيه؟ فيه ناس بتاكل وناس بتعيش وبقية الناس ما تلاقيش تشتغل، طب لصالح مين دا؟ هل لصالح الشعب؟ هل لصالح الاشتراكية اللي احنا بننادى بها؟ (ترد الجماهير .. لأ).

إذا احنا فى خطتنا بنعمل على أن الضروريات بتكون موجودة، ولكن كل قرش نقدر نصرفه فى الصناعة بنصرفه فى الصناعة.. وكل قرش بنقدر نصرفه فى الزراعة بنصرفه فى الزراعة.. وكل قرش بنقدر نصرفه فى الإنتاج بنصرفه فى الإنتاج؛ لأن أنا أمّا أعمل مصنع معناه إن أنا حاشغل ٥٠٠ عامل، معناه إن أنا باصلاح معيشة ٥٠٠ أسرة، مش بس أسرة العمال ولكن أسر المحيطين بالعمال؛ يمكن بعضكم قرأ تحقيقات فى المصانع على مصنع شبين الكوم، مصنع شبين الكوم ما أثرش بس على العمال.. أثر على المحيط اللي موجود مع العمال.

دا العمل اللي احنا ماشيين فيه، ودى السياسة اللي احنا مشينا فيها، بنينا لغاية دلوقت أكثر من ٨٥٠ مصنع، حبنى مصانع ومصانع ومئات المصانع، حنصلح الأرض، السد العالى حيدنا؛ الـ ٧٠٠ ألف فدان حياض حيحولهم لرى دايم، حنعمل بعد كده مليون ونص فدان أرض جديدة، حنزود الأرض الزراعية تقريباً بالتلت. يطلع يقول دى مصر فيها أزمة صناعية، دا فيه واحد فى سفاراتنا بره يمكن صدق هذا الكلام وباعت لأهله هنا - وأنا سمعت من واحد امبارح فاهم إن احنا وصلنا إلى حالة المجاعة - بيقول لهم بمناسبة رأس السنة هل أبعث لكم فخدة من بره؟ واللا أبعث لكم حنة لحمة؟ ما وصلش بنا الحال أبداً إلى هذا الشكل، احنا بنبنى بلدنا، وبنبنى بلدنا من أجل الـ ٣٠ مليون اللي عايشين فيها، الـ ٣٠ مليون اللي ساكنين فيها، بنبنى بلدنا ومش مستعدين أبداً إن احنا نبيع كرامتنا.. بنبنى بلدنا ونحافظ باستمرار وكل يوم نحافظ أكثر على هذه الكرامة.

إذا المعونة الأمريكية زى ما قال السفير امبارح إنهم هم مش مستعدين يتكلموا، بنقول لهم والله متشكرين وكتر خيركم، لكن احنا مش مستعدين نقبل كلام ولا نقبل أنزحة احنا بنقدر نوفر الـ ٥٠ مليون جنيه، وبنقدر يكون عندنا كفاية ذاتية، والشعب المصرى بيستطيع إنه يصبر ويكافح. نذكر فى سنة ٥٦ ماكانش عندنا أدوية وما ادوناش فلوس علشان الأدوية، تفنكروا فى سنة ٥٦ ماكانش عندنا قمح كان عندنا احتياطي ١٥ يوم ووقفوا توريد القمح، ما بنساش

احنا الأيام دي، وأنا أذكر إن الاتحاد السوفيتى فى سنة ٥٦ - وأنا بعث جواب فى هذا الوقت - بعث لنا قمح قبل ما يخلص الـ ١٥ يوم اللي موجود عندنا.

احنا بنطور بلدنا وبنطور مجتمعا، احنا سنة ٥٢ كنا بنصرف على الأدوية ٦ مليون جنيه، السنة دي ٢٥ مليون جنيه، السنة الجاية ٣٣ مليون جنيه، مين اللي كان بيشتري أدوية سنة ٥٦؟ الشعب كان بيشتري أدوية؟ طبقة محدودة هي اللي بتشتري أدوية؛ ولذلك كان الشراء بـ ٦ مليون جنيه، النهارده ٢٥ مليون جنيه، أكثر من أربع مرات، السنة الجاية ٣٣ مليون جنيه، اللي ماكانش بيقدر يشتري الدواء، بيشتري الدواء واللى كان ابنه يعيا ولا يجيبيلوش دوا النهارده.. أما ابنه بيعيا بيشتري له الدواء؛ علما إن احنا رخصنا الدواء ٢٥% بعد عمليات التأميم.

دى الاشتراكية اللي احنا بننادى بها، ودى الاشتراكية اللي احنا نعمل من أجلها. بيجوا بره يقولوا فيه أزمة اقتصادية لأن احنا.. احنا بنصرف فى العملة الصعبة، كل سنة هنا فيه عملة صعبة بتيجى عندنا ما بنوفرش منها، عندنا احتياطي من الذهب موجود للكوارث وموجود للأزمات، ولكن هل أوفر ١٠ مليون جنيه واللا أبني ١٠ مصانع؟ كل سنة أسأل نفسى هذا السؤال، آجى أقول لأ.. أنا بدل ما أوفر الـ ١٠ مليون جنيه بابني الـ ١٠ مصانع، وأما بابني الـ ١٠ مصانع باشغل ٥٠٠٠ عامل، وأما باشغل ٥٠٠٠ عامل بافتح ٥٠٠٠ بيت، وأما بافتح الـ ٥٠٠٠ بيت بافتح جنبهم ٥٠٠٠ بيت أو ١٠٠٠٠ بيت.

دى السياسة اللي احنا بنتبعتها، بنقدر نقول نوفر.. أوفر ١٠ مليون جنيه.. أوفر ٢٠ مليون جنيه.. أوفر ٣٠ مليون جنيه، عملية بسيطة، نتيجة هذا التوفير إن أنا أوفر ١٠ مليون جنيه يعنى باوفر ٥ مصانع، أوفر ٢٠ مليون جنيه يعنى باوفر ١٠ مصانع أو أوفر ٣٠ مليون جنيه يعنى أوفر ١٥ مصنع، وما أشغش هؤلاء الناس ويبقى عندنا ناس عاطلين نقول لهم والله بنعمل لكم شوية طرق تطلعوا تشتغلوا فيها وتطلعوا تحفروا شوية قنايات وشوية طرق، وكل واحد ياخذ له ١٠ صاغ فى اليوم أو ٨ صاغ فى اليوم، لكن هل دى خطتنا؟ مش

دى خطبتنا، هل دى فلسفة اشتراكييتنا؟ لأ.. دى فلسفة أى مجتمع قائم على حكم الطبقة، واحنا مجتمع مش قائم على حكم الطبقة.. ولكن مجتمع قائم على تحالف قوى الشعب العاملة.. مجتمع قائم على الكفاية والعدل.. مجتمع قائم على الاشتراكية.. مجتمع قائم على علشان يقضى على تحالف الإقطاع مع رأس المال.. مجتمع قائم على علشان يبني بلده، واسترد هذا المجتمع بلده فى سنة ٥٢. وزى ما قلت لكم قبل كده فى سنة ٥٦ اللي طلعا وشالوا السلاح أثبتوا وبينوا لمين الثورة.. الثورة لأبنائها من عمالها وفلاحينها ومثقفينها. إذا هذه الثورة الاشتراكية هى ثورة الشعب، ويجب أن تعمل من أجل الشعب، ومن أجل تحالف قوى الشعب العاملة.. لا من أجل الإقطاع ولا من أجل رأس المال ولا من أجل تحالف الإقطاع مع رأس المال، ولا من أجل الاستغلال.

### أيها الإخوة:

فى السنة اللي فاتت فى هذا المكان، توجهت بالدعوة إلى مؤتمر القمة العربى.. السبب إني توجهت بالدعوة إلى مؤتمر القمة العربى إن أنا كنت أرى الأخطار تتجمع من حول العالم العربى.. كان لأبد لنا أن نتجمع من أجل هدف حتى نقضى على مؤامرات الاستعمار، وحتى نقضى على مؤامرات إسرائيل، وحتى نتصدى لأى طارئ. وعقد مؤتمر القمة العربى الأول، وعقد مؤتمر القمة العربى الثانى، واستطعنا إن احنا نتجمع حول هدف.. استطعنا إن احنا نقيم القيادة العربية الموحدة.. استطعنا إن احنا نتفق على تحويل منابع نهر الأردن.. استطعنا أن نوحّد الكلمة العربية حول فلسطين، استطعنا أن نقيم منظمة تحرير فلسطين.. استطعنا أن نعمل مساندين لهذه المنظمة حتى تنظم شعب فلسطين، استطعنا أيضاً أن نساعد هذه المنظمة لإقامة جيش فلسطين، استطعنا إن احنا نخلق جهد دولى متناسق واقتراب فكري، وأكبر من هذا استطعنا إن احنا نحرم العدو من استغلال الخلافات اللي كان يبني عليها كل مخططاته العدوانية؛ سواء فى الحرب الباردة ضد الأمة العربية أو فى الحرب الساخنة ضد الدول العربية..

بعض - طبعاً - الخطوات دي تحقق، بين الجزائر والمغرب حصل خلاف وأمكن لهذا الخلاف إنه ينتهى.

طبعاً بين اليمن والسعودية فيه مشاكل، وكلنا عارفين إيه المشاكل اللي موجودة؛ إن احنا بالنسبة لمساندة اليمن قمنا بالواجب بتاعنا وزيادة؛ أمنا حدود اليمن تحت سيادة علم الجمهورية اليمنية، وحينما التقيت بالملك فيصل فى إسكندرية فى المؤتمر العربى - مؤتمر القمة العربى الثانى - اتكلمنا بحيث إن احنا نزيل الخلاف بيننا وبين السعودية، وبحيث إن احنا نحل المشاكل الناتجة عن الوضع فى اليمن، ونبدأ صفحة جديدة. طبعاً فيه حاجة بدى أقولها؛ شعيب اليمن كان متخلف من آلاف السنين، وعاش فى القرون الوسطى، والإمامة استطاعت إنها تضع عليه غلالة سميكة جداً من التخلف، فالنهارده لا ننزعج بأى حال من الأحوال إذا ظهرت أى متناقضات فى اليمن؛ لأن اليمن حينما يرفع عنه رداء التخلف لا بد حتظهر فيه متناقضات، بلد بينتقل من القرن العاشر إلى القرن العشرين مرة واحدة! طبعاً بتحاول قوى الاستعمار وتحاول قوى الصهيونية وتحاول الرجعية إنها تبين أو تستغل هذه المتناقضات وهذه الخلافات، ولكن احنا على ثقة من إن شعيب اليمن على درجة كبيرة من الوعي.. وسيستطيع شعيب اليمن أن يحل بنفسه هذه المتناقضات وهذه الخلافات.

واحنا لن نتدخل بأى حال من الأحوال بين اليمنيين وبين بعض فى داخل الجمهورية اليمنية؛ لأننا على ثقة إن فيه تناقضات لا بد إنها تظهر. وكان كل همنا وهدفنا إن الشعب اليمنى يتمكن بعد الخلاص من حكم أسرة حميد الدين وطغيانها أن يبدأ فى بناء الخراب، الذى تركه العهد الرجعى فى كل مكان. واتفقنا مع الملك فيصل على أساس أن يعقد مؤتمر مسن الأطراف المختلفة اليمنية، وإن هذا المؤتمر بيجمع القبائل، اللي بتحارب بعضها مع بعض أو القبائل اللي مختلفة مع بعض، وبعدين يسود السلام فى اليمن، ولا تتدخل أى قوى أخرى فى اليمن. والمباحثات بيننا وبين السعودية بالنسبة لليمن سايرة فى

طريقها؛ عقد مؤتمر ابتدائي، ومفروض يعقد مؤتمر ثاني، لازالت المحادثات دايرة بالنسبة لهذا المؤتمر الثاني.

حصلت طبعاً بعض الصعوبات.. وحصلت بعض المشاكل، ولكن في رأيي هذه الصعاب وهذه المشاكل تنتهي إذا خلصت النوايا، وأنا في كلامي مع الملك فيصل، شاعر إن النية خالصة من الجانبين؛ من جانبهم ومن جانبنا بحيث إن نحن نقضي على هذه المشكلة التي كانت حجر عثرة في سبيل العلاقات بيننا وبين الملك فيصل واحنا هنا في الجمهورية العربية المتحدة عازين نقوى العلاقات بيننا وبين المملكة العربية السعودية. طبعاً أمّا أتكلم على اليمن لازم نذكر بالتقدير الدور المجيد والدور الحضاري والدور الإنساني، التي قامت به القوات المصرية في اليمن، وهي تكافح وتقاتل من أجل شعب اليمن. طبعاً هذه القوات ضربت المثل الأعلى في تبنى دعوة القومية العربية والحرية العربية الثورة العربية.. هذه القوات ضربت المثل الأعلى في التضحية والفداء، لا من أجل أهداف أنانية ولكن من أجل تحرير الشعب اليمني، ومن أجل تثبيت الثورة اليمنية، ومن أجل حق الشعب اليمني في ثورته.

السنة التي فاتت اتكلمنا على مؤتمر القمة العربي، وكانت العلاقات بيننا وبين سوريا علاقات متأزمة، وكانت العلاقات علاقات يسودها الكثير من الخلاف، وبعد كده يمكن أنتم وجدتم إن سياستنا اتجهت إلى تصفية هذه الخلافات عدم إعطاء أعدائنا مجال؛ حتى يلعبوا على الخلافات بيننا. تقابلت في المؤتمر الثاني مع القادة السوريين، وكان رئيس الوفد الفريق أمين الحافظ واتفقنا على علاقة بيننا وبين سوريا، واحنا يهمننا بالنسبة لسوريا أمرين: يهمننا أن يبقى لشعب السوري كطليعة عربية.. يهمننا أيضاً أن تبقى لهذا الشعب دائماً قدرته على توفير أكبر الجهد لقضايا النضال العربي المشترك، وعلى هذا الأساس احنا بالنسبة للإذاعة، وبالنسبة للصحافة وبالنسبة لاتجاهنا، اتجهنا إلى فتح صفحة جديدة في علاقتنا مع الجمهورية السورية، بل أكثر من هذا أنا حاولت إن أنا أرفق في أثناء هذا المؤتمر، وفي مؤتمر عدم الانحياز بين الجمهورية السورية

والجمهورية العراقية؛ لأن أيضاً فيه حملات إذاعة متبادلة بين سوريا والعراق بيلعب عليها أعداؤنا وبيلعب عليها أعوان الاستعمار، وعملت بكل الوسائل، ولكن لم أوفق حتى الآن في هذا السبيل.

السنة التي فانت استطعنا إن احنا نحقق أيضاً نجاح في مجالنا العربي في مجال القومية العربية وفي مجال الوحدة العربية؛ اتفقنا مع العراق حينما زارنا أثناء مؤتمر عدم الانحياز وفد عراقي، برئاسة أخى الرئيس عبد السلام عارف.. اتفقنا على القيادة السياسية الموحدة مع العراق، والتي أعلنت أساميتها من يومين واطلعت عليها، وأنتهز هذه المناسبة لأوجه إلى شعب العراق الشقيق كل تقدير، وإن احنا بنمشى مع بعض يدنا في أيدين بعض، على أساس أن نحقق هدفنا الكبير في الوحدة بعد سنتين، زى ما قلنا في الاتفاقية اللي وقعت بيننا وبين العراق.

دا في المجال الدولي، ودا في المجال العربي.

في مجالنا الداخلى إذا أردنا إن احنا نحيا حياة كريمة.. لا بد إن احنا نبني؛ نبني بلدنا، ونبني الديمقراطية، نبني بلدنا ازاي؟

احنا قضينا على الإقطاع، وقضينا على الرأسمالية المستغلة، وزى ما قلت في مجلس الأمة ما قضينا على الإقطاعيين ولا قضينا على الرجعيين، ولا قضينا على الرأسماليين.. لازالوا موجودين، وطبعاً الإقطاعيين والرجعيين والرأسماليين لا يمكن بأى حال من الأحوال انهم يؤمنوا بالاشتراكية، لا يؤمنوا إلا بحكمهم؛ حكم الطبقة.. حكم الإقطاع المتحالف مع رأس المال. وتحولنا إلى مرحلة الانطلاق زى ما قلنا، وفي مرحلة الانطلاق أعلننا إن احنا ندعم الاشتراكية، الاشتراكية زى ما قلنا، كفاية وعدل.. كفاية بإن احنا نبني مصانع ونصلح أرض ونقيم إنشاءات، عدل بإن احنا نذيب الفوارق بين الطبقات، ونقضى على الاستغلال بكل أنواعه وبكل مظاهره.

فى نفس الوقت احنا قلنا قبل كده إن احنا نريد أن نبني الحياة الديمقراطية السليمة، وقلنا إن احنا لا يمكن أن نقيم ديمقراطية سياسية إلا إذا أقمنا ديمقراطية اجتماعية؛ لأن الديمقراطية السياسية كانت موجودة عندنا هنا قبل سنة ٥٢، كان فيه برلمان، وكان فيه قبة برلمان، وكان فيه أعضاء نواب.. وكان فيه وزارة بتسقط، وكان فيه وزارة بتيجي، ولكن هل كان فيه ديمقراطية حقيقية؟ كان فيه ديمقراطية لطبقة واحدة؛ طبقة مستغلة تمثل تحالف الإقطاع مع رأس المال.. هذه الديمقراطية ليست إلا الديمقراطية الزائفة اللي احنا بنسميها ديكتاتورية الرأسمالية. وقلنا منذ أول يوم من أيام الثورة لابد لنا من إقامة حياة ديمقراطية سليمة، ولكي نقيم الحياة الديمقراطية السليمة، كان لابد لنا أن نقضى على رأس المال المستغل وعلى الإقطاع، وفى نفس الوقت نقيم تحالف قوى الشعب العاملة، وفى نفس الوقت نقول إن احنا حققنا الديمقراطية الاجتماعية.. كل واحد له الحق فى العمل.. كل واحد له الحق فى التعليم، كل واحد له الحق فى العلاج.. كل واحد له الحق فى المعاش.. كل واحد له حق فى ثروة بلده، وذلك بسيطرة الشعب على وسائل الإنتاج أو ملكية الشعب لوسائل الإنتاج.

بعد التأميم.. بعد قرارات يوليو ٦١.. بعد قرارات أغسطس ٦٣.. بعد قرارات مارس ٦٤ بنقول إن احنا استطعنا أن نضع أساس الديمقراطية الاجتماعية، وبهذا يمكن أن تقوم ديمقراطية سياسية؛ أى إقامة حياة ديمقراطية سليمة، وبهذا ننتقل من دور الثورة للشعب إلى الثورة بالشعب.

وفى مارس الماضى أعلن الدستور، وأقيمت الانتخابات، وأقيم مجلس الأمة، وانتهت الأحكام العرفية، واستكملنا بناء الاتحاد الاشتراكي، وبدأنا مؤتمرات فى قواعد الاتحاد الاشتراكي وحركات خلافة. وأنا غير منزعج من بعض الانحرافات اللي بتظهر فى مؤتمرات الاتحاد الاشتراكي، الاتحاد الاشتراكي فيه ٦ مليون إذا ظهرت بعض الانحرافات فى بعض الوحدات أو فى بعض وحدات فى الاتحاد الاشتراكي الشعب العامل الواعى اللي استطاع إنه يقيم الديمقراطية الاجتماعية يستطيع إنه يقوم ديمقراطياً هذه الانحرافات. واحنا النهارده نبدأ

ممارسة ديمقراطية ما نخافش أبداً من أى انحرافات تقابلنا، ولكن لازم نكون واعيين ونكون صاحيين ونشوف إن دى انحرافات، وإن واجبنا أن نقوم هذه الانحرافات.

المناقشة المفتوحة التى تجرى فى كل مكان، فى مؤتمرات الاتحاد.. فى الصحافة.. فى مجلس الأمة.. فى كل الاجتماعات هى علامات صحة، مانخافش منها أبداً النهارده لأن احنا بنبنى الديمقراطية السليمة. مجلس الأمة بيناقش، هذه المناقشات إن دعت إلى شىء فإنما تدعو إلى السعادة، ما نخافش النهارده.. ما نخافش من ديمقراطيتنا إنها تأخذها طبقة من الطبقات أو تستولى عليها طبقة من الطبقات.. ليه؟ عندنا فى مجلس الأمة ٥٠% عمال وفلاحين وعندنا تحالف قوى الشعب العاملة.. النهارده بننتقل فى الاشتراكية حتى تكون الثورة بالشعب، ولازم الناس نتكلم، والناس إذا تكلمت وتناقشت فى المواضيع طبعاً فيه ناس حتغلط، ويمكن ناس بتلخ كمان مش بتغلط، ما نخافش أبداً من هذا الكلام، ولكن بنقول إن دى عوامل صحية فى بنائنا للديمقراطية. أكثر شىء نستطيع إن نثبت به المكاسب الكبيرة اللى حصلنا عليها إن احنا ننجح فى بناء الحياة الديمقراطية السليمة.. إن احنا ننجح فى بناء حياة ديمقراطية للشعب، الشعب اللى آمن بالاشتراكية، والشعب اللى آمن بالميثاق، والشعب اللى نادى بإذابة الفوارق بين الطبقات. والديمقراطية ستكون دائماً هى الدرع الحامى لهذا الشعب، ولكن ما نديش فرصة أبداً للرجعيين، أو الرأسماليين، أو المستغلين إنهم يضحكوا علينا تحت اسم الاشتراكية، أو التباكى على الاشتراكية، وكلنا عارفين مين هم الرجعيين.. وكلنا عارفين مين هم الإقطاعيين.. وكلنا عارفين مين هم أصحاب المصالح البائدة اللى كانت موجودة قبل الثورة، واللى بعد الثورة وجدوا إن سلطانهم ونفوذهم انتهى، وإن الشعب بيحصل على سلطاته والشعب بيحصل على نفوذه. أنا باقول لكم إن احنا عندنا النهارده ديمقراطية مش موجود زيتها فى كل المناطق المحيطة بنا.. مجلس الأمة بيتكلم، الحكومة بتتكلم، مجلس الأمة بقى هنا إيه؟ مجلس أمة من الشعب مش مجلس أمة من فئة مستغلة من الرأسماليين..

مجلس الأمة لا يمثل حكم الطبقة المستغلة.. اللى هى تمثل سيطرة الإقطاع ورأس المال؛ زى ما هو كان موجود سنة ٥٢، ولكن مجلس الأمة يمثل العمال، والفلاحين، والمتقنين، وقوى الشعب العاملة.

بعد كده بيكون قدامنا إن احنا نعمل على زيادة الإنتاج.. علشان نطلب لازم نزود إنتاجنا، إذا ما زودناش إنتاجنا من القطن ومن القمح ومن الذرة أمال حناكل منين؟ احنا بنبيع القطن وبنجيب به آلات، القمح والذرة والمحاصيل اللى عندنا، بنستهلك شىء، الفواكه بنستهلك شىء، بنبيع شىء علشان نجيب به آلات؛ يعنى عايز أقول لكم إن احنا الآلات دى ما بنجيبهاش ببلاش، بنجيبها بفلوس، وإن الفلوس اللى احنا بندفعها هى الفلوس اللى بنصدر بها.. الأرض محدودة، الزيادة الموجودة محدودة.. نتوسع بعد كده على الآبار، المليون ونص فدان بتوع السد العالى لازم نعمل على إنهم يكونوا ٢ مليون فدان، الأرض الساحلية اللى فيها مطر لازم نعمل على ان نزرع فيها بساتين من الفواكه، نستغل كل جزء فى بلدنا.

المرحلة الأولى من السد العالى تمت، المرحلة الثانية من السد العالى ساير العمل فيها، فى سنة ٦٧ - بإذن الله - بنستطيع إن احنا نحجز جميع المياه، اللى جاية فى الفيضان، السنة دى ما قدرناش نحجز إلا ٥ مليار بس، اللى بيبجى بيكون أكثر من ٢٠ مليار.

السنة الجاية بنبتدى الخطة الثانية، بالنسبة للصناعة بتكون الخطة الثالثة وهى الخطة القائمة على الصناعة الثقيلة، السنة دى حققنا أهدافنا فى الصناعة وحققنا أهدافنا فى الزراعة، بنهاية هذه السنة بنكون حققنا فى الزراعة إصلاح مايقرب من نص مليون فدان زى الخطة.

بالنسبة للمصانع وبالنسبة للصناعة حققنا أهدافنا.. طبعًا إذا كانت قابلتنا بعض مشاكل، أو قابلتنا بعض صعاب؛ لا يمكن بأى حال إن هذه المشاكل أو هذه الصعاب بتخلينا نكفر، أو بتخلينا نتردد فى طريقنا.. ليس أمامنا من طريق

إلا الإنتاج؛ مزيد من الإنتاج، نزود فى إنتاجنا الزراعى، نزود فى إنتاجنا الصناعى.. نزود فى الديمقراطية الاشتراكية، كل سنة بنأخذ من تجاربنا ونزود فى تجاربنا الديمقراطية، مشاكلنا ومشاكل الإنتاج لا يحلها إلا مزيد من الإنتاج.. المصانع .. بابنى مصانع وباشغل عمال، وباديهم أجور، بيطلعوا يصرفوا هذه الأجور ويشترى بضائع، باعوز أبنى مصانع تانى، وأشغل عمال وأديها أجور، وتشترى بضائع ولا أستوردش بضائع من بره، أشتري بس آلات من الخارج؛ علشان أزود المصانع. مشاكل الإنتاج بنحلها بمزيد من الإنتاج.. مشاكل الديمقراطية بنحلها بمزيد من الديمقراطية، الانحرافات لايد أن نقومها بكل شدة وبكل عنف، واحنا قلنا الحرية كل الحرية للشعب، ولا حرية لأعداء الشعب.. الناس اللي عايزين يرجعوا بنا إلى ما كنا فيه قبل سنة ١٩٥٢.. مالناش طريق نمشى فيه إلا طريق واحد؛ هو ان نسير إلى الأمام، نبني الإنتاج وننمى، وفى نفس الوقت نبني الديمقراطية.

بالنسبة للإنتاج احنا عملنا شىء، بالنسبة للإنتاج احنا قلنا إن الإنتاج فيه ممثلين للعمال ٤ فى كل مجلس إدارة، كانوا ٢ فى كل مجلس إدارة خلياتهم ٤ فى كل مجلس إدارة، وقلنا بهذا ان احنا بنعمل ديمقراطية، وإن الشعب العامل يشارك فى الإنتاج.

بالنسبة للخدمات عندنا مشكلة.. وأنا أرى ان لايد أيضاً من أن تكون هناك ديمقراطية أكثر فى الخدمات، إلى جانب محاولة إعادة تنظيم الحكومة؛ زى الشعب ما بيشارك فى إدارة أجهزة الإنتاج يجب أن يشارك الشعب فى الإشراف على الخدمات، وينبغى أن نجد الوسيلة التى نجعل بها الخدمات تحت إدارة الشعب لتخدمه، ولتحسن خدمته، والخدمات اللى موجودة فى البلد كلها.. المستشفيات والمدارس كل هذه الخدمات هى لخدمة الشعب.

فيه حاجة بدى أقولها.. إن المشاكل لن تنتهى أبداً، وعلى رأس هذه المشاكل مشكلة زيادتنا ٧٠٠ ألف، أو ٨٠٠ ألف كل سنة، طبعاً ٧٠٠ ألف كل سنة يعنى عايزين أكل لمليون واحد كل سنة زيادة.. يعنى لازم نشغل أكثر لنزيد الإنتاج؛

علاشان نوكل مليون واحد كل سنة، عايزين نقيم زراعة قوية، ونقيم صناعة قوية، وندير الصناعة ونبنيتها، نتوسع فى الخدمات، ونتوسع فى التأمينات.. شعبنا دائماً أثبت قدرته على حل المشاكل، وأثبت حيويته، وأثبت إمكانيته على تحقيق النصر.

العام اللي فات استطعنا إن احنا نحقق فيه أهداف الخطة، أو ما يقرب من أهداف الخطة، استطعنا إن احنا نحقق فيه الديمقراطية، استطعنا إن احنا نبدأ أول سنة من الثورة بدون أحكام عرفية؛ بالقانون العادى، وأنا باعتبار إن هناك نجاح كبير، وأنا كنت منتظر ان بعد ما نلغى الأحكام العرفية بتطلع الرجعية وبيطلع الإقطاعيين وبيطلع الرأسماليين، ويقولوا إنهم مطمئنين من غير أحكام عرفية، طلعوا طبعاً، وطبعاً حصلت بعد هذه الفترة - فترة إلغاء الأحكام العرفية - بعض حملات من الهمس، وبعض حملات من الكلام، واحنا ما قابلناهاش أبداً بالعنف، ولكن تركناها؛ لأن احنا كنا بنعتبر إن دا وضع طبيعى أن يحصل خلاف. كان فيه أحكام عرفية لمدة ١٢ سنة.. انتهت الأحكام العرفية فى مارس اللي فات، وقامت حياة برلمانية، وقامت ديمقراطية سليمة، وقام مجلس أمة، فيه ناس انضروا طبعاً فى الـ ١٢ سنة، الإقطاعيين انضروا، المستغلين انضروا، الرأسماليين انضروا، الناس اللي تأممت مصانعهم طبعاً مش راضيين بتأميم مصانعهم.. بيطلعوا بعد إلغاء الأحكام العرفية، وكل واحد يتكلم له كلمتين، وكل واحد يحاول يهمس له همستين، ولكن أنا رأيت إن الشعب أقوى من كلامهم، والشعب أقوى من همساتهم؛ لأن هذا الشعب كان أقوى من طيارات الإنجليز والفرنساويين واليهود، وأقوى من أساطيل الإنجليز والفرنساويين واليهود.. واستطاع أن يقضى على العدوان، واستطاع أن ينتصر، واستطاع أن يبني بلده، واستطاع أن يرفع رايته، واستطاع أن يرفع إرادته. والله يوفقكم.

والسلام عليكم ورحمة الله.

١٩٦٤/١٢/٢٤

## خطاب الرئيس جمال عبد الناصر

فى مؤتمر الاتحاد الاشتراكى من الإسماعيلية

■ أيتها الإخوة المواطنين.. أيتها الإخوة:

يسعدنى أن ألتقى اليوم بشعب الإسماعيلية (هتافات بحياة الرئيس عبد الناصر) يسعدنى أن ألتقى معكم هنا فى الإسماعيلية.. ويظهر بقى لنا مدة طويلة ماجيناش عندكم فى الإسماعيلية، وعلشان كده الترحيب زايد شوية عن اللزوم.. النهارده واحنا فى أواخر سنة ١٩٦٤.. بعد ٨ سنين من العدوان الفاشل على بلدنا، بيحق لنا إن احنا نعرف إيه عملناه منذ هزمننا العدوان؛ البلد بقت بلدنا، بنبنينا علشاننا وعلشان أولادنا، الديمقراطية ديمقراطية لنا؛ بتتبع من شعبنا، من أجل مصلحتنا ومصلحة أبنائنا، صمنا على إن احنا نسير فى طريقنا، وسرنا فى هذا الطريق، وبعون الله نجحنا. البلد كانت فى الماضى.. كانت ملك لعدد قليل من أبنائها، والشعب كله كان محروم من حق المواطن فى بلده.. كانت هناك الديمقراطية الزائفة، وكان هناك الاستغلال والإقطاع والرأسمالية، وكانت فئة قليلة بتمتع بخيرات البلد، وتأخذها لنفسها ولأبنائها، أما باقى البلد فكانت محرومة من كل شىء، وكانوا يقولوا على هذا إنه ديمقراطية، واحنا كنا نعتقد أن هذه ليست ديمقراطية بأى حال من الأحوال؛ لأنها ديمقراطية زائفة يضحكون بها علينا ويضحكون بها على عقولنا، ولكن مين اللى بيحكم؟ أصحاب النفوذ..

مين اللى بيحكم؟ أصحاب الأموال.. مين اللى بيحكم؟ أصحاب الأرض.. مين اللى بيأخذ خيرات البلد؟ أصحاب النفوذ، أصحاب الأموال، أصحاب الأرض.

وسارت هذه الديمقراطية، ولم نؤمن أبداً فى أى وقت من الأوقات إن هذه الديمقراطية تعمل أو تتجه إلى منفعة الشعب كشعب، ومنفعة الجماعة كجماعة. بعد ثورة ٢٣ يوليو، وبعد القضاء على الاستعمار، وبعد القضاء على الاحتلال، وبعد القضاء على العدوان.. صممنا على أن نقيم الحياة الديمقراطية السليمة بين بلادنا؛ بحيث تكون هذه الديمقراطية معبرة عنا، ومعبرة عن آمالنا، ومعبرة عن مطالب شعبنا؛ ليست ديمقراطية زائفة لفئة قليلة من الناس، وليست ديمقراطية للإقطاعيين، وليست ديمقراطية للرأسماليين، ولكن ديمقراطية للشعب.

وكان يجب علينا، حتى نحقق هذا الهدف الذى نادى به الثورة من أول يوم من أيامها.. أن نقيم بين ربوع بلدنا، بين أرجاء وطننا؛ العدالة الاجتماعية التى عبرنا عنها فى الميثاق بالاشتراكية.. كان لابد من الحل الاشتراكي؛ حتى نصفى حكم الطبقة.. حتى نصفى حكم الإقطاع، وحتى نصفى حكم رأس المال وحتى نصفى حكم الاستغلال.. وحتى نقيم فى ربوع بلدنا وبين أرجاء وطننا ديمقراطية الشعب.. الديمقراطية السليمة، كان لابد من الاشتراكية.. وكان لابد من العدالة الاجتماعية.. وكان لابد من الديمقراطية الاجتماعية؛ حتى نستطيع أن نحقق الديمقراطية السياسية.

الديمقراطية السياسية لا يمكن أن تتحقق بأى حال من الأحوال، إذا لم تتحقق الديمقراطية الاجتماعية، وسرنا فى هذا السبيل.. قضينا على الإقطاع، وحددنا الملكية، قضينا على سيطرة رأس المال، ثم سيطر الشعب على وسائل الإنتاج، بل تملك الشعب أغلب وسائل الإنتاج، أصبحت المصانع ملكاً للشعب، مش ملك للرأسمالى المستغل، ولا ملك لفئة قليلة من الناس، أصبح أكثر من ٨٥% من الصناعة ملكاً للشعب كله، العائد من هذه الصناعة يعود إلى الشعب.. أصبحت الأرض حددت فيها الملكية، ووزعت الأرض على الفلاحين. مش بس أممنا المصانع، ومش بس حددنا ملكية الأرض، ولكن صلحنا أرض جديدة، ونتجه

دائمًا إلى إصلاح أرض جديدة، وأقمنا مصانع جديدة، أقمنا أكثر من ٨٥٠ مصنعًا جديدًا ملكًا للشعب.

وبهذا حققنا الديمقراطية الاجتماعية، الديمقراطية الاقتصادية.. بهذا قضينا على حكم الطبقة.. حكم تحالف الإقطاع مع رأس المال، بهذا تخلصنا من أصحاب النفوذ ومن المستغلين.. بهذا أصبحنا في وضع يمكننا من أن نقيم حياة ديمقراطية سليمة، أن نقيم الديمقراطية السياسية.

وفي هذا العام قامت بين ربوع وطننا أول تجربة سياسية ديمقراطية سليمة؛ في هذه المنطقة التي نعيش فيها.. ديمقراطية تقوم على القضاء على الإقطاع، والقضاء على الاستغلال، والقضاء على سيطرة رأس المال، والقضاء على حكم الطبقة، وتقوم على تحالف قوى الشعب العاملة.. الشعب الذي يشعر كل فرد منه بالمساواة، والذي يشعر كل فرد منه أن له حقوقًا في بلده، والذي يشعر كل فرد منه أنه له حق المواطن، وأن البلد مش ملك لحفنة قليلة من الناس، تتحكم فيه زى إرادتها وكيف تشاء، ولكن البلد ملك لكل أبناء الشعب.

أقمنا في بلدنا الديمقراطية السليمة، لا الديمقراطية المستغلة، ولا الديمقراطية الزائفة.. ولا ديمقراطية الطبقة الحاكمة التي تتركز في فئة قليلة من الإقطاعيين والرأسماليين؛ وبهذا يحق لكل واحد منكم أن يفخر أننا استطعنا بعد ١٢ سنة أن نقيم الحياة الديمقراطية السليمة، التي نادينا بها من أول يوم، ولم يكن ممكنًا أبدًا أن نقيم هذه الحياة الديمقراطية السليمة إلا بعد أن نصفى الإقطاع، وإلا بعد أن نصفى سيطرة رأس المال، وإلا بعد أن يسيطر الشعب على كل وسائل الإنتاج.. النهارده الشعب سيطر على كل وسائل الإنتاج، أصبحت وسائل الإنتاج والمصانع اللي كانت ملك فلان باشا وملك فلان بيه، واللى كانت ملك عدد قليل من الناس ما يطلعوش ١٠٠ عيلة واللا ١٥٠ عيلة.. أصبحت هذه الأموال كلها ملكًا للشعب، الأموال التي أمت والأموال التي سيطر عليها الشعب وصلت إلى أكثر من ١٠٠٠ مليون جنيه، الـ ١٠٠٠ مليون جنيه دول كانوا ملكًا لعدد قليل من الأسر، وكان هذه العائلات هي العائلات التي لها الحق في أن تعيش في هذه

البلاد.. انتهى عهد السيادة وانتهى عهد الطبقة، ونحن الآن في عهد تحالف قوى الشعب العاملة.

طبعاً علشان نحقق هذا ماكانش أبداً من السهل؛ علشان نحقق هذا ماكانش أبداً بالأمر السهل.. احنا علشان نوصل لدا دخلنا في حرب مع الاستعمار، ودخلنا في حرب مع أعوان الاستعمار، وجابها العدو في سنة ٥٦، هزيمتنا للعدوان في سنة ٥٦ هي اللي مكنتنا من إن احنا النهارده نقف ونقول إن احنا بنقيم الحياة الديمقراطية السليمة في بلدنا ونحتفل بهذه الأعياد، ونشعر بالثقة.. نشعر ان احنا نجحنا في إقامة الحياة الديمقراطية السليمة.. الديمقراطية الاجتماعية والديمقراطية السياسية، ونفخر أن نظامنا الديمقراطي هو أسلم نظام ديمقراطي؛ لأنه نظام ديمقراطي قائم على مساواة أبناء الشعب جميعاً، نظام ديمقراطي قائم على أساس تكافؤ الفرص وتساوي الفرص، جميع الطلبة لهم الحق في التعليم مجاناً في الجامعة؛ كل واحد له الحق إنه يدخل الجامعة بحسب الدرجات، اللي بيحصل عليها في التوجيهية، مافيش فرق بين ابن فلان وابن فلان، حكاية إن فلان أبوه كذا أو فلان أبوه كذا أو فلان من عيلة فلان، كل الكلام دا انتهى.

علشان نخلص هذا الكلام، حاربنا حرباً طويلة، وكافحنا كفاحاً طويلاً.. من أول يوم من أيام الثورة يوم ٢٣ يوليو سنة ٥٢، لغاية النهارده سنة ٦٤، بنكافح. وأما نبص للمستقبل نجد إن احنا حتى نحافظ على هذه الانتصارات لابد لنا أن نكافح؛ نكافح كفاحاً طويلاً لأن الشعب بطبيعته شعب طيب.. الشعب بطبيعته شعب مسلم. هل قضينا على الإقطاع وقضينا على الإقطاعيين؟ هل قضينا على الرأسمالية وقضينا على الرأسماليين؟ هل قضينا على الاستعمار وأعوان الاستعمار قضاءً كاملاً؟ قضينا على الإقطاع فعلاً، قضينا على الرأسمالية فعلاً، سيطر الشعب على وسائل الإنتاج فعلاً، ولكن اللي كانوا بيتحكموا فينا في الماضي.. الطبقة اللي كانت بتتحكم في الماضي لازالت موجودة، يمكن جردناها من أسلحتها.. جردناها من أموالها، ولكن هذه الطبقة لازالت موجودة، ولسه عايزين عشرات السنين لغاية ما تفرض هذه الطبقة.. يبقى الشعب لابد أن يتسلح

بإيه؟ يتسلح الشعب بالوعي؛ علشان ما ينضحكش عليه، علشان بينى الديمقراطية السليمة.. علشان يقيم العدالة الاجتماعية، ويقيم الاشتراكية فى كل أنحاء البلد.

من أجل أن نقيم الاشتراكية، ومن أجل أن نقيم العدالة الاجتماعية، لابد لنا أن نعمل عملاً مستمرًا ونعمل عملاً متواصلًا، لن يرضى الاستعمار ولن يرضى أعداؤنا بأى حال من الأحوال، ولن ترضى الصهيونية؛ إن احنا نقوى. أما نسمع إذاعات أعدائنا نجد إن أعداءنا باستمرار يحبوا يبيثوا فينا روح الهزيمة، ليه روح الهزيمة؟ علشان ما نقواش؛ لأن قوتنا هنا فى داخل بلدنا هى سد منيع، ودرع واق ضد كل محاولات الاستعمار والصهيونية، التى تريد أن تجعل هذه المنطقة داخل مناطق النفوذ.

الديمقراطية الاشتراكية اللى بننادى بها هى ديمقراطية الشعب العامل، الذى يجب أن يتسلح بالوعي.. الشعب العامل المتسلح بالوعي حتى لا يستطيع أعداء الشعب إنهم يضللوه، أو يضحكوا عليه، أو يبيثوا بينه الكلام الذى لا يتجه بأى حال إلى البناء. باستمرار من أول الثورة لغاية دلوقت كنا بنسمع التشكيك، أنا سمعت - نفسى - إن احنا مش حنقدر نطلع الإنجليز، وأنا قلت لكم امبارح إن هذا الشعب الطيب طلع الإنجليز مش مرة واحدة سنة ٥٦.. طلع الإنجليز مرتين، طلع الإنجليز بناء على اتفاقية الجلاء وبعدين طلع الإنجليز بعد العدوان. مش بس طلع الإنجليز، دا طلع الإنجليز وطلع الفرنساويين وطلع أيضاً اليهود، هذا الشعب قادر وهذا الشعب قوى، ويستطيع إذا عبأ جهوده، وإذا نظم نفسه، وإذا تسلح بالوعي؛ أن يفعل المستحيلات. من أقدم العصور هذا الشعب صنع المستحيل.. من أقدم العصور هذا الشعب صنع المستحيل.. من أقدم العصور هذا الشعب كان شعب مكافح، وكان شعب مقاتل، وكان شعب بيبنى نفسه بنساء قوى وبناء متين.

إذا أردنا أن نتغلب على الاستعمار وعلى الصهيونية، هل نعتمد على الخارج حتى نحصل على حاجاتنا واللا نعتمد على نفسنا؟ يجب أولاً أن نعتمد على أنفسنا.. تكون عندنا صناعة قوية.. تكون عندنا زراعة قوية.. تكون عندنا

مصانع حربية.. نكون بنعمل الطيارة بتاعتنا.. نعمل المدفع بتاعنا.. بنعمل البندقية بتاعتنا. فى سنة ٤٨ ليه الدول العربية - ٧ دول عربية - ما قدرتش على إسرائيل؟ لأن احنا كنا بنستورد الأسلحة من الخارج، وإسرائيل كانت بتستورد الأسلحة من الخارج، احنا منعت عنا الأسلحة، ولكن هل منعت الأسلحة عن إسرائيل؟ لم تمنع الأسلحة عن إسرائيل سنة ٤٨. احنا ماكانش عندنا دبابات فى سنة ٤٨، واليهود فى أول الحرب ماكانش عندهم دبابات، ولكن بعد شهرين كان اليهود عندهم دبابات واحنا ما قدرناش نحصل على دبابات.. كان عندنا عدد قليل من الدبابات التى كانت تسمى "فخاخ الموت"؛ لأن الدبابة كانت بأى طلقة بتتحرق، وتموت الناس اللى فيها، ولكن اليهود قدروا يجيبوا طائرات، وقدروا يجيبوا دبابات؛ لأن الصهيونية العالمية والاستعمار العالمى كان بيغذيهم وكان بيساعدهم.. لغاية النهارده إسرائيل بتأخذ فلوس منين؟ بتأخذ فلوس من الدول الاستعمارية، بتديها معونات، إسرائيل واخدة فى السنة اللى فاتت أو السنة اللى قبل اللى فاتت أسلحة من ألمانيا الغربية.. مين اللى خلاها أخذت الأسلحة؟ هل اشترت الأسلحة دى بفلوس؟ أبدأ أخذت أسلحة من ألمانيا الغربية معونة.. معونة أسلحة من ألمانيا الغربية.. مين اللى دفع ألمانيا الغربية علشان تديها هذه الأسلحة؟ أمريكا.

فإذا أردنا أن نتعرض للاستعمار، وإذا أردنا أن نتعرض للصهيونية.. ليس لنا من سبيل إلا أن نعتد على أنفسنا، وأن نعمل.. نعمل عملاً متواصلًا، ونعمل عملاً مستمرًا.. نعمل فى ميادين الصناعة اللى اتأخرنا عنها، نعمل فى ميادين الصواريخ.. نعمل فى الميادين الذرية.. نعمل فى الميادين الزراعية.. نعمل فى كل مكان؛ بهذا نستطيع أن نبني قواتنا الأصيلة.. قواتنا الحقيقية.. بهذا نستطيع أن نبني بلدنا.. بهذا نستطيع أن نتكلم ونحن على ثقة من أننا نتكلم ومعنا قوة. بناء بلدنا هو أساس كل شىء، وعلشان كده سنجد دائماً من يحاول أن يعطل بناء بلدنا، ولكن هدفنا يجب أن يكون دائماً هو بناء بلدنا، ولا تردنا عن هذا الهدف أى مشاكل أو أى مصاعب.

نجد باستمرار محطات إذاعة بتهاجمنا، ولا يبهمننا هذه الإذاعات.. بنجد شاه إيران يبهاجمنا.. بنجد محطة إسرائيل بتهاجمنا.. بنجد إن المحطات الاستعمارية بتهاجمنا.. بنجد محطة الإذاعة البريطانية بتهاجمنا، كل ما تهاجمنا هذه المحطات بنعتقد إن احنا ماشيين فى طريقنا الصبح، نقلق قوى يوم ما نصبح الصبح ونلاقى ان هذه المحطات بتشكر فينا ما بتهاجمناش، يبقى لازم عملنا حاجة غلط!!

علشان نبنى بلدنا يبقى لازم كل واحد يشتغل شغل مستمر وشغل كامل، وعلشان كل واحد يشتغل، يبقى لازم نوجد له العمل اللى يعمل فيه؛ بنوجد المصانع، بنوجد المزارع، بنخلص الخطة الخمسية الأولى، نبتدى الخطة الخمسية الثانية، كمان ما ندلش نفسنا، مافيش داعى أبدأ ان بعض الناس يتمتعوا بكل طلباتهم وباقى الناس بيحرموا من كل شىء، ثم لا يجدوا أيضاً العمل اللى يعملوا فيه. يجب أيضاً إن احنا نوجد عمل لكل واحد، ونوجد الضروريات لكل واحد، وبعد كده الكماليات نحن جميعاً فى غنى عنها. لما نبص الناس اللى قاعدين هنا بنقول الكم ألف اللى موجودين هنا، كم واحد فيهم بيستخدم الكماليات، نجد ما يطلعش واحد فى الألف، ولا واحد فى الألفين أو واحد فى الـ ٣ آلاف، الكماليات احنا مش فى حاجة إليها، احنا فى حاجة إن احنا نبنى بلدنا، واحنا فى حاجة إنه احنا نعوض السنين الطويلة اللى فانتنا فى الماضى تحت اسم الديمقراطية الزائفة. ولا يمكن بأى حال من الأحوال أن تقوم ديمقراطية مع الاستعمار، كان فيه هنا استعمار إنجليزى، وكان فيه احتلال بريطانى، وكانت هناك ديمقراطية أو ما يسمونها بالديمقراطية.

احنا النهارده تخلصنا من الاحتلال وتخلصنا من الإقطاع.. وتخلصنا من سيطرة رأس المال، وأقمنا فعلاً الحياة الديمقراطية السليمة، الحياة الديمقراطية السليمة هى اللى تخلى كل واحد يأمن على حاضره، ويأمن على مستقبله. احنا فى نفس الوقت بننظم نفسنا بواسطة الاتحاد الاشتراكى العربى، الاتحاد الاشتراكى العربى هو التنظيم السياسى اللى يجمع كل المواطنين من أجل العمل على تحقيق أهداف الثورة، وتحقيق أهداف الميثاق. ولكن أنا بدى أقول حاجة:

إن التنظيم السياسي - اللي هو الاتحاد الاشتراكي العربي - مش كله عبارة عن مؤيدين للثورة.. هناك بعض أفراد أو بعض ناس يمكن يعتبروا من القوى المعادية للثورة، ودخلوا برضه الاتحاد الاشتراكي. مش واجبي أنا أكشف هؤلاء الناس، واجب الشعب؛ الشعب بعماله فلاحينه ومثقفينه، إنه يكشف هؤلاء الناس، واحنا قلنا فى الماضى حينما أعلننا الميثاق؛ قلنا إن احنا بنريد أن نعطي الحرية كل الحرية للشعب، ولا حرية لأعداء الشعب، إذا ادينا حرية لأعداء الشعب، للمنحرفين، يستطيعون بهذه الحرية إنهم ينفذوا فى خلال الأعمال الجليلة والأعمال الكبيرة اللي احنا بنعملها؛ ولهذا يجب أن تكون الحرية للشعب، ويجب ألا يتهاون هذا الشعب فى حقوقه، ولا يعطى أى فرصة للمنحرفين بأنهم يخرجوه عن طريقه اللي رسمه الميثاق.. بهذا بنبى الديمقراطية السليمة، بهذا بنبى الاشتراكية، بالاشتراكية والديمقراطية السليمة نستطيع أن نضمن أننا نسير فى الطريق السليم، وفى الطريق الصحيح.

الاشتراكية هي إيه؟ الاشتراكية هي الكفاية والعدل؛ العدل كان بالتأميم وبالقضاء على سيطرة الطبقة، وسيطرة الشعب على وسائل الإنتاج، الكفاية هي أن نعمل دائما على أن نزيد من المصانع ومن الأراضي الزراعية الجديدة؛ حتى تكفينا المصانع، وحتى تكفينا الأرض الزراعية. الاشتراكية هي الكفاية والعدل، الجزء الخاص بالعدل احنا عملناه؛ عملنا جزء كبير منه وحققنا، يبقى أفضل الجزء الخاص بالكفاية، احنا بنزيد.. كل سنة بنزيد حوالي ٧٠٠ ألف أو أكثر من ٧٠٠ ألف؛ أى ما يقرب من مليون، علشان نوجد لهؤلاء الناس الجدد عمل يبقى لازم نعمل باستمرار على زيادة الصناعة وعلى زيادة الزراعة. الديمقراطية السليمة، والمزيد من الديمقراطية السليمة هو سبيلنا حتى نجعل هذه الديمقراطية راسخة. النهارده ما بنخافش، وزى ما باقول إذا كان فيه انحرافات، فلا بد الشعب حيكشف هذه الانحرافات، وإذا كان فيه منحرفين لا بد الشعب حيكشف هؤلاء المنحرفين، وزى ما قلنا لا يمكن إن احنا نعطي الحرية لأعداء الشعب، الشعب نفسه لن يمكن أعداءه بأى حال من الأحوال من أن تكون لهم

الحرية ليقضوا عليه، أو ليقضوا على مكاسبه اللتي حصل عليها.. الشعب نفسه سيباشر هذه الحرية ويباشر هذه الديمقراطية لتسير في طريقها السليم، وتسير في طريقها الصحيح.

طبعاً واحنا بنبنى بلدنا لا يمكن إن احنا ننسى أهدافنا الأخرى؛ أهدافنا بالنسبة للقومية العربية.. أهدافنا بالنسبة للوحدة العربية.. أهدافنا بالنسبة لتحرير جميع البلاد العربية، وجميع أرض العرب من الاستعمار، ما ننشأ أهدافنا في أن نساند قضية الحرية في العالم.. ما ننشأ أهدافنا في أن نساند قضية السلام في العالم، ما ننشأ أهدافنا في أن نعمل من أجل السلام، واحنا بنبنى بلدنا، واحنا بنتكلم على الاشتراكية، واحنا بنتكلم على الديمقراطية.. واحنا بنتكلم على الاشتراكية، واحنا بنتكلم على بناء بلدنا، واحنا بنتكلم على التصنيع، واحنا بنتكلم على توسيع الرقعة الزراعية ما ننشأ أبداً أهدافنا الأخرى؛ إن احنا زى الدول ما ساندتنا في الماضي، احنا علينا أيضاً أن نساند قضايا الحرية في كل مكان، قضايا السلام في كل مكان، ودا الدور اللتي احنا بنقوم به، لا نتردد بأى حال من الأحوال عن إن احنا نساند أى بلد يبتال بالحرية، وبتال بالاستقلال.. ما بنسكتش عشان نجامل البلد الفلاني.. ما بنسكتش عشان نجامل البلد الأخر، ولكن بنقول حقنا، بنقول الكلام اللتي احنا نؤمن به، الكلام الحق؛ إن احنا نؤمن بحق كل بلد في تقرير مصيره، وحق كل بلد في الحرية.

بهذا - أيها الإخوة المواطنون - نستطيع فعلاً أن نبنى قواتنا المسلحة، وأن نبنى بلدنا، ونستطيع أن نحرر فلسطين؛ تحرير فلسطين لا يكون بالكلام، تحرير فلسطين بالعمل؛ لأن إسرائيل ليست إسرائيل فقط، ولكن إسرائيل هي إسرائيل ومن هم وراء إسرائيل. سنبنى بلدنا ونبنى قواتنا، سنبنى الاشتراكية ونبنى الديمقراطية، وسنعمل على تحرير جميع الأراضي العربية بكل قواتنا.. سنثبت راية القومية العربية، وسنعمل على الوحدة العربية؛ لأن الوحدة العربية هي أيضاً الدرع الواقى ضد الصهيونية وضد الاستعمار. والله يوفقكم.

والسلام عليكم ورحمة الله.